

〔類聚國史帝三十一〕弘仁五年四月乙巳幸左近衛大將正四位下藤原朝臣冬嗣閑院供張之宜甚有雅致天皇○嵯峨染翰群臣獻詩時人以爲佳會授冬嗣從三位無位藤原美都子從五位下賜五位以上衣被

〔類聚國史帝三十一〕弘仁七年二月辛酉幸典侍從三位小野朝臣石子長岡之第命文人賦詩授石子正三位無位高賀茂朝臣伊豫人從五位下則石子之女也賜五位已上衣被

〔類聚國史帝三十一〕天長七年九月壬辰天皇幸大納言清原真人夏野新造山莊擇詞客三十人令賦詩應製也賜侍從及文人祿有差授主人室無位葛井宿禰庭子第二男正六位上瀧雄從五位下

〔文德實錄五〕仁壽三年二月庚寅晦帝幸冷然院翫景物也賜侍臣祿有差即日亦幸右大臣藤原朝臣良房第以覽櫻花置酒興樂六位已上會者賜祿各有差三月甲午授正六位下難波連鬢麻呂外從五位下緣去月遊賞右大臣第而恩及家人也

〔三代實錄八〕貞觀六年二月廿五日壬午車駕幸於太政大臣○藤原良房東京染殿第觀櫻花中路駐蹕於一條第卽是帝降誕之處也太政大臣以肴醴賜扈從群臣文武官積祿物於庭中令帝覽訖班賜有

差遂幸染殿花亭親王已下侍從已上並侍焉太政大臣別令伶人教習樂一部喚能屬文者五位已上十人諸司六位十人文章生二十人命樂賦詩具醉歡樂移自花亭御於射場帝御弓矢一發中鵠群臣稱萬歲親王已下以次遞射山城國司守正四位下紀朝臣今守等率郡司百姓於東垣外行耕田之禮欲令帝覽之知農民之有事也自晨至暮極樂而罷賜親王公卿文武百僚祿各有差夜分還宮

〔三代實錄十二〕貞觀八年三月廿三日己亥鸞輿幸右大臣藤原朝臣良相西京第觀櫻花喚文人賦百花亭詩預席者四十人四位四人五位八人六位二十八人天皇御射庭賜親王以下侍從已上射左右近衛中少將預焉中鵠者賜布伶官奏樂玄髻稚齒十二人遞出而舞晚奏女樂歡宴竟日賜扈從百官祿各有差夜分之後乘輿還宮是日進參議右大辨從四位上兼行播磨權守大枝朝臣音人參議右近